



## SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 14. stav (1) Zakona o finansiranju političkih stranaka («Službeni glasnik BiH» broj 22/00, 102/09 i 54/10), člana 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08), izdajem

### IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2010. GODINU HRVATSKE STRANKE PRAVA BOSNE I HERCEGOVINE

Broj: 03-07-6-469/11  
Sarajevo, 26. septembar 2011. godine

## SADRŽAJ

1. UVOD .....	4
2. PREDSTAVLJANJE POLITIČKE STRANKE .....	4
3. OPIS PREGLEDA I KONTROLE FINANSIJSKOG IZVJEŠTAJA .....	5
Predmet pregleda i kontrole .....	5
Cilj pregleda i kontrole .....	5
Obim pregleda i kontrole .....	5
4. PRETHODNE KONTROLE I REVIZIJE .....	5
5. NALAZI I PREPORUKE .....	5
5.1. NALAZI.....	5
5.2. PREPORUKE.....	9

## MIŠLJENJE REVIZORA

Služba za reviziju finansiranja političkih stranaka izvršila je pregled godišnjeg finansijskog izvještaja Hrvatske stranke prava BiH za 2010. godinu.

Rukovodstvo stranke je odgovorno za finansijske izvještaje, postupanje stranke u skladu sa Zakonom o finansiranju političkih stranaka i članom 15.10 Izbornog zakona BiH i uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Na osnovu našeg pregleda utvrđeno je sljedeće:

- 1. Hrvatska stranka prava Bosne i Hercegovine nije ispoštovala odredbe člana 6. stav (2), člana 8. stav (1) i stav (2) i člana 11. stav (1) i stav (3) Zakona o finansiranju političkih stranaka.**
- 2. Hrvatska stranka prava Bosne i Hercegovine prekršila je odredbe člana 15.1 stav (1) Izbornog zakona BiH i člana 11. stav (2) Zakona o finansiranju političkih stranaka.**

**Pregledom, odnosno kontrolom finansijskog izvještaja, osim gornjih napomena pod 1. i 2., nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka niti na finansiranje troškova izborne kampanje suprotno odredbama člana 15.10 Izbornog zakona BiH.**

## 1. UVOD

Služba za reviziju finansiranja političkih stranaka (u daljem tekstu: Služba za reviziju) je izvršila pregled godišnjeg finansijskog izvještaja Hrvatske stranke prava BiH za 2010. godinu.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka («Službeni glasnik BiH» broj 61/06) i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08).

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

U godišnjem finansijskom izvještaju Hrvatska stranka prava BiH iskazala je prihode u ukupnom iznosu 311.116,92 KM, što se vidi iz sljedeće tabele:

Red. br.	Vrsta prihoda	Iznos u KM	Učešće u ukupnom prihodu %
1	Članarina	280,00	0,09 %
2	Prilozi fizičkih lica	2.000,00	0,65 %
3	Prilozi pravnih lica	7.100,00	2,28 %
4	Prihodi od imovine	40,54	0,01 %
5	Prihodi od pr.lica	0,00	
6	Prihodi od poklona	0,00	
7	Prihodi iz budžeta	301.696,38	96,97 %
	<b>Ukupni prihodi:</b>	<b>311.116,92</b>	<b>100,00 %</b>

U godišnjem finansijskom izvještaju Hrvatska stranka prava BiH iskazala je rashode u ukupnom iznosu 510.291,02 KM.

## 2. PREDSTAVLJANJE POLITIČKE STRANKE

Naziv političke stranke: Hrvatska stranka prava Bosne i Hercegovine. Stranka je nosila naziv Hrvatska stranka prava Bosne i Hercegovine „Đapić – dr. Jurišić“ koji je Rješenjem broj R/2-10 od 18.03.2010. godine kod Općinskog suda Mostar promjenjen u Hrvatsku stranku prava Bosne i Hercegovine. Skraćeni naziv stranke je HSP BiH. Hrvatska stranka prava BiH je registrovana 23.01.2008. godine kod Općinskog suda u Mostaru pod brojem R/6-07.

Sjedište političke stranke je u Mostaru, Kneza M.V. Humskog 39.

Lica ovlaštena za zastupanje stranke su Zvonko Jurišić, predsjednik stranke i Žarko Pavlović, zamjenik predsjednika stranke.

Lice ovlašteno za podnošenje finansijskih izvještaja za 2010. godinu je Krasnodar Vasić.

Prema podacima iz godišnjeg finansijskog izvještaja stranka nema organizacione dijelove nižeg nivoa (entitetske, kantonalne, opštinske).

### **3. OPIS PREGLEDA I KONTROLE FINANSIJSKOG IZVJEŠTAJA**

**Predmet pregleda i kontrole** je godišnji finansijski izvještaj Hrvatske stranke prava BiH za 2010. godinu.

**Cilj pregleda i kontrole** je da revizor na bazi finansijskog izvještaja pokuša da ustanovi da li je Hrvatska stranka prava BiH u izvještajnom periodu postupala u skladu sa odredbama Zakona o finansiranju političkih stranaka i odredbama člana 15.10 Izbornog zakona BiH. Ukoliko revizor na bazi kontrole finansijskog izvještaja utvrdi određena kršenja navedenog zakona, ocjenjuje da li je potrebno izvršiti reviziju u prostorijama političke stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka i da li su troškovi izborne kampanje u okviru zakonom dozvoljenih.

**Obim pregleda i kontrole** finansijskih izvještaja Hrvatske stranke prava BiH obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na priloge fizičkih i pravnih lica, prihode iz budžeta, kao i troškove izborne kampanje.

### **4. PRETHODNE KONTROLE I REVIZIJE**

Služba za reviziju izvršila je reviziju godišnjeg finansijskog izvještaja za 2006. i 2009. godinu i pregled godišnjih finansijskih izvještaja za 2007. i 2008. godinu nakon čega je izdala izvještaje o reviziji i izvještaje o pregledu sa mišljenjem revizora, nalazima i preporukama revizije da stranka treba da postupa u skladu sa odredbama člana 4. stav (2), člana 8. stav (1) i člana 11. stav (1) i stav (3) Zakona o finansiranju političkih stranaka.

#### **Nerealizovane preporuke:**

Na osnovu uočenih nedostataka u godišnjem finansijskom izvještaju za 2010. godinu, utvrđeno je da politička stranka nije ispoštovala sve preporuke revizije koje su date u izvještajima o pregledu godišnjih finansijskih izvještaja, odnosno stranka i dalje krši odredbe člana 8. stav (1) i člana 11. stav (1) i stav (3) Zakona o finansiranju političkih stranaka.

### **5. NALAZI I PREPORUKE**

#### **5.1. NALAZI**

- a) **Na osnovu obavljenog pregleda i kontrole godišnjeg finansijskog izvještaja utvrđeno je da je Hrvatska stranka prava BiH prekršila odredbe člana 6. stav (2) Zakona o finansiranju političkih stranaka<sup>1</sup>.**

---

<sup>1</sup> Ako ukupni iznos priloga jednog lica iz stava 1 člana 4. ovog Zakona premašuje 100 KM, ta uplata se mora unjeti u finansijski izvještaj u skladu sa članom 11. ovog Zakona.

Uvidom u dodatnu finansijsku dokumentaciju koju je stranka dostavila Centralnoj izbornoj komisiji BiH utvrđeno je da je stranka primila prilog pravnog lica Boe Solo u iznosu od 2.000,00 KM, koji nije iskazan u godišnjem finansijskom izvještaju<sup>2</sup>.

**b) Na osnovu obavljenog pregleda i kontrole godišnjeg finansijskog izvještaja utvrđeno je da je Hrvatska stranka prava BiH prekršila odredbe člana 8. stav (1) Zakona o finansiranju političkih stranaka<sup>3</sup>.**

- Stranka je za svoj rad u periodu od 01.01.2010. do 01.06.2010. godine, bez naknade koristila poslovne prostorije u vlasništvu Grada Mostara<sup>4</sup>. Rješenjem broj: 07/II-1-2042/99 od 10.11.1999. godine Općina Mostar - Jugozapad je ovoj političkoj stranci dodijelila na korištenje poslovni prostor površine 120,85 m<sup>2</sup> u Ulici Kneza Mihajla Viševića Humskog broj 39 u Mostaru. Na osnovu Odluke o dodjeli u zakup, korištenju i održavanju poslovnih prostora u vlasništvu Općine Mostar - Zapad („Službeno glasilo Gradske općine Mostar-Zapad“, broj 9/01), cijena poslovnog prostora na području Mostara za neprofitabilne i humanitarne organizacije iznosi 10,00 KM/m<sup>2</sup>. Na osnovu navedene Odluke utvrđeno je da mjesečna zakupnina poslovnog prostora koji koristi Hrvatska stranka prava BiH iznosi 1.208,50 KM mjesečno, odnosno 7.251,00 KM za 6 mjeseci. Obzirom da stranka nije plaćala zakup navedenog poslovnog prostora ostvarila je prilog u iznosu od 7.251,00 KM, koji je zabranjen Zakonom o finansiranju političkih stranaka.
- Pored navedenog, Hrvatska stranka prava BiH koristila je i poslovni prostor, u vlasništvu općine Grude, bez naknade<sup>5</sup>.

**c) Na osnovu obavljenog pregleda i kontrole godišnjeg finansijskog izvještaja utvrđeno je da je Hrvatska stranka prava BiH prekršila odredbe člana 8. stav (2) Zakona o finansiranju političkih stranaka<sup>6</sup>.**

- Prema podacima iz godišnjeg finansijskog izvještaja utvrđeno je da je HSP BiH primio zabranjeni prilog pravnog lica „Hering d.d.“ Široki Brijeg u iznosu od 5.000,00 KM. Naime, pravno lice „Hering d.d.“ je na osnovu tendera za izvođenje dodatnih radova na izgradnji mosta na Bulevaru vojvode Živojina Mišića – Grad Banja Luka zaključilo II Aneks ugovora broj 12-G-2382-2/2008 od 02.03.2010. godine sa navedenim upravnim organom na lokalnom nivou<sup>7</sup>. Na osnovu naprijed navedenog, a u skladu sa odredbama Zakona o finansiranju političkih stranaka, pravno lice „Hering d.d.“ ne može finansijski pomagati političke stranke, te se prilog u iznosu od 5.000,00 KM smatra zabranjenim.

**d) Na osnovu obavljenog pregleda godišnjeg finansijskog izvještaja i kontrole dodatne finansijske dokumentacije, utvrđeno je da Hrvatska stranka prava BiH nije postupala u**

<sup>2</sup>Uplata navedenog pravnog lica evidentirana je na izvodu broj 94 od 23.07.2010. godine Raiffeisen Bank dd BiH, transakcijski račun stranke broj: 1610200033710023.

<sup>3</sup>Državni, entitetski i kantonalni organi, organi općinskih i mjesnih zajednica, javne institucije, javna preduzeća, humanitarne organizacije, preduzeća koja su po samoj svojoj djelatnosti isključivo neprofitna, vjerske zajednice, kao i privredna udruženja u kojima uloženi javni kapital iznosi najmanje 25% ne mogu finansirati političke stranke.

<sup>4</sup>Stranka je 17.06.2010. godine zaključila ugovor o zakupu poslovnih prostorija sa Gradom Mostarom broj 02-25-7243/10 za period od 01.06.2010. do 31.12.2010. godine sa mjesečnom zakupninom od 1.208,50 KM uz obavezu plaćanja PDV na navedeni iznos.

<sup>5</sup>Dopis općine Grude broj 02-05-480/11 od 06.04.2011. godine.

<sup>6</sup>Privatna preduzeća koja obavljaju javne usluge na osnovu ugovora sa vladom ne mogu finansijski pomagati političke stranke.

<sup>7</sup>Dopis Grada Banja Luka broj 04-40-1110/11 od 25.08.2011. godine.

**skladu sa odredbama člana 11. stav (1) i stav (3) Zakona o finansiranju političkih stranaka<sup>8</sup>.**

(1) Stranka u kontrolisanom periodu nije vodila adekvatne evidencije o svojim prihodima i rashodima i na taj način postupila je suprotno odredbama člana 11. stav (1) Zakona o finansiranju političkih stranaka.<sup>9</sup>

- Uvidom u dodatnu finansijsku dokumentaciju političke stranke vezanu za promet blagajne, koji se iskazuje na obrascu 2-1 finansijskog izvještaja (Pregled stanja blagajne), utvrđeno je da isplate sredstava iz blagajne nisu evidentirane u momentu kada su i izvršene, a samim tim ni troškovi nisu evidentirani u momentu kad su nastali. Naime, detaljnom kontrolom dnevnika blagajne za decembar 2010. godine utvrđeno je da stranka isplaćuje u decembru račune koji se odnose na januar, februar, mart i april 2010. godine. U istom mjesecu isplaćeni su i evidentirani računi za gorivo u iznosu 969,90 KM od prethodne 2009. godine<sup>10</sup>. Ovakav način vođenja evidencija nije u skladu sa računovodstvenim propisima i odredbama člana 11. stav (1) Zakona o finansiranju političkih stranaka.
- Stranka je godišnji finansijski izvještaj za 2010. godinu popunila i dostavila na nivou stranke, odnosno troškove na obrascima 4-1 (Režijsko-administrativni i ostali troškovi) je dostavila zbirno na nivou stranke i nije ih popunila i dostavila po organizacionim dijelovima.
- Kontrolom godišnjeg finansijskog izvještaja koji je stranka dostavila Centralnoj izbornoj komisiji BiH, utvrđeno je da stranka nije iskazala sve prihode koje je u 2010. godini primila iz budžeta i to za slijedeće organizacione dijelove stranke:
  - Na osnovu akta Općine Livno broj 02-05-532/11 od 19.05.2011. godine, koji je dostavljen na zahtjev Centralne izborne komisije BiH, utvrđeno je da je stranka prihod iz budžeta Općine Livno iskazala u manjem iznosu za 900,00 KM.
  - Na osnovu akta Službe za financije Općine Čitluk broj 05-403-41/11 od 19.05.2011. godine, koji je dostavljen na zahtjev Centralne izborne komisije BiH, utvrđeno je da stranka nije iskazala u godišnjem finansijskom izvještaju, niti u svojim poslovnim knjigama, prihod iz budžeta Općine Čitluk u ukupnom iznosu od 3.180,00 KM. Navedeni iznos uplaćen je na transakcijski račun HSP BiH podružnica Čitluk<sup>11</sup>, koji stranka nije iskazala u godišnjem finansijskom izvještaju.
  - Na osnovu akta Općine Domaljevac-Šamac broj 01-14-871-1/11 od 07.07.2011. godine, koji je dostavljen na zahtjev Centralne izborne komisije BiH, utvrđeno je da stranka nije iskazala u godišnjem finansijskom izvještaju, niti u svojim poslovnim knjigama, prihod iz budžeta Općine Domaljevac-Šamac u ukupnom iznosu od 900,00 KM, čime su i ukupni prihodi stranke umanjeni za navedeni iznos.

<sup>8</sup> Političke stranke vode evidenciju o svojim prihodima i rashodima. Politička stranka je obavezna da Centralnoj izbornoj komisiji Bosne i Hercegovine podnese finansijski izvještaj za svaku kalendarsku godinu (računovodstvenu godinu). Do 31.03. naredne godine političke stranke podnose finansijski izvještaj u formi koju odobri Centralna izborna komisija Bosne i Hercegovine. Ovaj izvještaj sadrži podatke utvrđene Izbornim zakonom. Centralna izborna komisija Bosne i Hercegovine donosi propise za provođenje odredbi kojima se bliže utvrđuju sadržaj, forma, način i drugi detalji izvještavanja.

<sup>9</sup> Političke stranke vode evidenciju o svojim prihodima i rashodima. Politička stranka je dužna da Centralnoj izbornoj komisiji BiH podnese finansijski izvještaj za svaku kalendarsku (računovodstvenu) godinu.

<sup>10</sup> Isplata br. 204 iznos 34,91 KM i isplata broj 221 ukupno 7 računa u iznosu 507,83 KM, isplata broj 226 iznos računa 41,00 KM, isplata broj 229 iznos 100,00 KM, isplata broj 233 u iznosu 227,16 KM, isplata broj 234 iznos 159,00 KM

<sup>11</sup> Dopis predsjednika HSP Čitluk, u potpisu Tihomir Šarac, upućen općini Čitluk 19.01.2010. godine „Obavjest o promjeni žiro računa stranke“

(2) Stranka je postupila suprotno odredbama člana 11. stav (3) Zakona o finansiranju političkih stranaka i suprotno Pravilniku o godišnjim finansijskim izvještajima političkih stranaka.<sup>12</sup>

- Pregledom godišnjeg finansijskog izvještaja i dodatne dokumentacije koju je stranka dostavila Centralnoj izbornoj komisiji BiH utvrđeno je da stranka nije iskazala svoje organizacione dijelove nižeg nivoa, čime je prekršila odredbe člana 9. i člana 10. Pravilnika o godišnjim finansijskim izvještajima političkih stranaka<sup>13</sup>.
- Kontrolom godišnjeg finansijskog izvještaja utvrđeno je da je stranka prekršila odredbe člana 11. Pravilnika o godišnjim finansijskim izvještajima političkih stranaka, jer obrazac 2 (Pregled prometa svih transakcijskih računa političke stranke) nije popunila u skladu sa navedenim Pravilnikom. Naime stranka nije iskazala transakcijski račun broj: 3060150000902887 Hypo Alpe-Adria bank d.d.<sup>14</sup>
- Kontrolom godišnjeg finansijskog izvještaja utvrđeno je da je stranka prekršila odredbe člana 13., člana 15. i člana 19. Pravilnika o godišnjim finansijskim izvještajima političkih stranaka, jer obrazac 3 (Ukupni prihodi političke stranke – izvori finansiranja), obrazac 3-b (Prilozi pravnih lica veći od 100 KM) i obrazac 3-f (Prihodi iz budžeta) nije popunila u skladu sa navedenim Pravilnikom.  
U skladu sa članom 15. Pravilnika stranka je imala obavezu u godišnjem finansijskom izvještaju prijaviti sve priloge pravnih lica veće od 100,00 KM zajedno sa nazivom organizacionog dijela stranke koji je primio prilog, naziv pravnog lica donatora i njegov identifikacioni broj, te datum kad je prilog dat. Stranka je prekršila odredbe navedenog člana Pravilnika, jer u obrascu 3-b nije iskazala prilog pravnog lica u iznosu od 2.000,00 KM.  
U skladu sa članom 19. Pravilnika stranka je imala obavezu u godišnjem finansijskom izvještaju iskazati sva sredstva iz budžeta svih nivoa vlasti koje je primila u izvještajnom periodu. Stranka je prekršila odredbe navedenog člana Pravilnika, jer u obrascu 3-f nije iskazala prihode po ovom osnovu u ukupnom iznosu od 4.980,00 KM.
- Stranka je prekršila odredbe člana 23. Pravilnika jer obrazac 5 (Pozajmice, krediti i dugovi) nije popunila u skladu sa Pravilnikom<sup>15</sup>. Stranka nije popunila obrazac 5 pod tačkom 5.2 Ostala dugovanja, već je u prilogu dostavila specifikaciju dobavljača u kojoj su iskazane obaveze iznosu od 178.293,75 KM, ali ista ne sadrži datum nastanka i rok vraćanja duga.

**e) Hrvatska stranka prava BiH je prekršila odredbe člana 15.1 stav (1) Izbornog zakona BiH i člana 11. stav (2) Zakona o finansiranju političkih stranaka.**

Uvidom u službene evidencije, utvrđeno je da Hrvatska stranka prava BiH nije Centralnoj izbornoj komisiji Bosne i Hercegovine dostavila finansijski izvještaj za period od dana podnošenja prijave za ovjeru za izbore do dana ovjere rezultata izbora, čime je prekršila odredbe člana 15.1 stav (1) Izbornog zakona BiH<sup>16</sup> i člana 11. stav (2) Zakona o finansiranju

<sup>12</sup> Do 31.03. naredne godine političke stranke podnose finansijski izvještaj u formi koju odobri Centralna izborna komisija Bosne i Hercegovine. Ovaj izvještaj sadrži podatke utvrđene Izbornim zakonom. Centralna izborna komisija Bosne i Hercegovine donosi propise za provođenje odredbi kojima se bliže utvrđuju sadržaj, forma, način i drugi detalji izvještavanja.

<sup>13</sup> (1) U obrazac 1, *Opći podaci o političkoj stranci*, unose se svi podaci o političkoj stranci na koju se finansijski izvještaj odnosi, između ostalog i da li stranka ima organizacione dijelove nižeg nivoa (odgovor DA ili NE). (2) U obrazac 1-1, *Teritorijalna struktura političke stranke*, unose se za sve nivoe organiziranja (glavni uredi, entitetske, kantonalne, općinske i druge organizacije) sljedeći podaci: naziv organizacionog dijela političke stranke i adresa, telefon i faks.

<sup>14</sup> Navedeni račun ugašen je 26.02.2010. godine – izvještaj iz jedinstvenog registra transakcijskih računa - Centralna banka BiH.

<sup>15</sup> U Obrazac 5, Pozajmice, krediti i dugovi, unose se sljedeći podaci: a) Ukupne obaveze po kreditima i pozajmicama...; b) Ukupne obaveze po dugovanjima – 5.2 Ostala dugovanja: naziv povjerioca, iznos duga, datum nastanka duga, visina rate i rok vraćanja duga.

<sup>16</sup> U skladu sa navedenim članom u roku od 30 dana od dana objavljivanja izbornih rezultata u Službenom glasniku BiH, politička stranka dužna je podnijeti i finansijski izvještaj za period od dana podnošenja prijave za ovjeru za izbore do dana ovjere rezultata izbora.



političkih stranaka. Naime, politička stranka dužna je podnijeti poseban finansijski izvještaj za period izborne propagande na način utvrđen Izbornim zakonom BiH.

### **Troškovi predizborne kampanje**

Hrvatska stranka prava BiH nije dostavila finansijski izvještaj za period od dana podnošenja prijave za ovjeru za izbore do dana ovjere rezultata izbora. Prema podacima iz godišnjeg finansijskog izvještaja HSP BiH za 2010. godinu, stranka je u svrhu finansiranja troškova izborne kampanje potrošila 215.556,16 KM.

Prema odredbama člana 15.10 Izbornog zakona BiH politička stranka za potrebe izborne kampanje ne smije potrošiti više od 0,30 odnosno 0,20 KM<sup>17</sup> po biraču u svakom izbornom krugu, prema broju birača koje je objavila Centralna izborna komisija BiH. Prema podacima Centralne izborne komisije BiH, Hrvatska stranka prava BiH je u svrhu izborne kampanje mogla da potroši 1.462.643,00 KM.

## **5.2. PREPORUKE**

*Preporučuje se Hrvatskoj stranci prava Bosne i Hercegovine da se pridržava odredbi Zakona o finansiranju političkih stranaka i Izbornog zakona BiH, a posebno na osnovu uočenih nedostataka se preporučuje:*

- *da u finansijskim izvještajima prijavljuje priloge veće od 100 KM u skladu sa članom 6. stav (2) Zakona o finansiranju političkih stranaka,*
- *da se ne finansira iz izvora, koji su političkim strankama zabranjeni Zakonom o finansiranju političkih stranaka,*
- *da u skladu sa članom 11. stav (1) Zakona o finansiranju političkih stranaka uspostavi pravilne i potpune evidencije o svim prihodima i rashodima,*
- *da u skladu sa članom 11. stav (2) Zakona o finansiranju političkih stranaka i poglavljem 15 Izbornog zakona BiH, podnosi Centralnoj izbornoj komisiji Bosne i Hercegovine finansijske izvještaje u roku i na način utvrđen ovim Zakonima i*
- *da finansijske izvještaje podnosi Centralnoj izbornoj komisiji Bosne i Hercegovine u skladu sa odredbama člana 11. stav (3) Zakona o finansiranju političkih stranaka, odnosno u formi propisanoj Pravilnikom o godišnjim finansijskim izvještajima političkih stranaka.*

---

<sup>17</sup> Član 15.10 stav (2) Izbornog zakona BiH, propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.

## **KOMENTAR**

U ostavljenom roku, Hrvatska stranka prava Bosne i Hercegovine nije se očitovala na nalaze revizije i mišljenje revizora dato u Preliminarnom izvještaju o pregledu godišnjeg finansijskog izvještaja za 2010. godinu, koji je dostavljen stranci 05.09.2011. godine.

Mr. Hasida Gušić, šef Službe za reviziju

Nevenko Andan, revizor

Amela Batuša, pomoćnik revizora